

Arzalluz: «Su-etena buztanetik oratu eta ez dugu askatuko lintxatu arren»

Jarrera horrek eragin du Eusko Jaurlaritzan abertzaleak besterik ez egotea

Itziaki Uriarte / Bilbo

Bakegintza izango da Juan Jose Ibarretxe buru izango duen gobernuaren lehentasuna. Lehendakari berriak arratsaldeko ordu batean egingo dio zin ardurari Gernikako Juntetxean, eta gaur bertan EAEko Gobernu berriaren osakera iragar dezake. EAJk balantze baikorra egin zuen amaitu den urteaz, nahiz eta transferentzietan eta preso hurbiltzean aurrerapenik eza deitoratu.

EAJ-K ekonomiaren hazkuntza, lagabeziaren murrizketa, ETaren su-etena, EHk Parlamentuan parte hartzea eta Ibarretxeren aldeko botoa ematea azpimarratu ditu EAJk «urte ezohiko eta garrantzitsu» honen alde on gisa. Presoak Euskal Herrira hurbildu ez izana, UPNk eta PPk EAE eta Nafarroako parlamentuek eginiko lankidetzak akordioa hautsi izana, eta Estatutuaren eskuduntzek transferitu gabe irautea beste aldean jarri zituzten Xabier Arzalluz eta Joseba Egibarrek.

«Guretzat premiazkoa da baketzea, eta lortzea espero dugu, su-eten hau behin betikoa egin behar dugu urratsez urrats», berretsi zuen Xabier Arzalluzek.

Piztu den itxaropena era grafikoan azaldu zuen: «Su-etena buztanetik oratu dugu, eta ez dugu askatuko, lintxatuko gaituzten arren. Hori da Ibarretxeren gobernuaren zeregina eta gobernu horretan nazionalistak besterik ez egonaren gakoa».

Arzalluzen ustez, «Ibarretxek arrazoi du esaten duenean baketzea lehentasuna bada, diagnostiko bakarra egon behar duela. Hemen ezin daitezke mediku bi egon Gobernuan: batek esaten duena ebakuntza egin behar zaio bestela hil egingo delako, eta beste batek esaten duena ezin daitekeela ebakuntzarik egin bestela hil egingo delako». Dena denakoa dela ere, «bide argi bat izan beharko du, hau funtsezkoa delako gure herrirako».

Ibarretxek lortuko duenaren komentzimendua azaldu zuen Arzalluzek. «Ni erabat baikor nago Ibarretxeren kudeaketaz, gure lehentasu-



Xabier Arzalluzek 1998. urtearen balantze politikoa egin zuen urtezahar egunean EAJren izenean.

«Desiratzen nago preso guztiak kalean dauden eguna ikusteko»

■ EAJ Bilboko kaleetan izango da hurrengo larunbatean presoak Euskal Herrira ekar ditzaten eskatzeko. «Gu ez goaz kalera inor presionatzeko, gu goaz kalera aspertuta», ohartarazi zuen Arzalluzek. «PSOEk eta PPkoak ez dute deitzen, baina beste denok deitzen dugu eta beste denok gara Euskadiko gehiengoak bai politikoki, bai sindikalki, gehiengo osoa. Guk kalera deitzen badugu eta jendea kalera badoa, hori argu-

mento bat da, ez da presioa, argumentoa da». Dezepzio puntu bat ere erakutsi zuen Arzalluzek Espainiako Gobernuaren jokabideagatik. «Nik itxaropena galdua daukat, nik itxaropena neukan eta bizia Gabonetarako denak hemen egongo zirela, eta badakit Aznarren inguruan batzuk zeudela honen alde eta lan egin dutela honen alde baina ez dute irabazi, galdu egin dute, beste batzuke indar gehiago izan dute».

«Nik espero nuen Aznarrek presoak hurbilduko zituela Gabonetarako, eta horretarako ez da espetxe legerik aldatu behar, espetxe politikaren abusua bertan behera gertatzea baizik».

Burukide jeltzalearen aburuz, hurbiltzetik aurrera, «presoei dagokien beste guztia negoziatzekoaren esparruan dago, ETA eta Gobernuaren artekoan, edo kartzelatan dauden presoekikoan, hori beraien artekoa da, ez da nirea. Ni desi-

ratzen nago biolentzia guztia amaitu eta preso guztiak kalean dauden eguna ikusteko, hori normaltasunaren eguna izango delako», nabarmendu zuen Xabier Arzalluzek Gabonzaharrean.

Espetxean dagoen Mahai Nazionalari dagokionez, zigorra kritikatu zutela gogoratu zuen Arzalluzek: «bere egunean azterketa juridikoa egin genuen eta ateratzen dituzten egunean, ateratzen badituzte, poztasunez ospatuko dugu».

na baketzea da. EAJ alden du egin da, orain arte beti egon gara gobernu batekin eta besterekin laguntzen, bilatzen, pentsatzen... ikusi dugunean ezetz, beste lehentasun batzuk dituztela, gure kontura hasi gara lanean. Ez inoren kontra, honen alde baino, eta horretan jardungo dugu», gaineratu zuen Arzalluzek.

«Hitz egin den guztiaren ondoren, ikusten dugu alderdi eta giro batzuetan ez dela ondo hartu, gutxienez bakea heltzeko bide hau. Beste era

batera nahi izango lukete bakea, edo porrot osoaz, edo norbaitentzat etekin politiko jakina lortuz, baina ez bakea besterik gabe, arazoa konpontzea».

Ustekabeak gobernuan

Juan Jose Ibarretxek lehendakari ardurari zin egingo dio gaur Gernikako Juntetxean. Gaur bertan lehendakariak Gobernu berriaren osakera eman dezake aditzera. Xabier Arza-

Iluzek gabonzaharrean aurreratutakoaren arabera, Juan Jose Ibarretxek presa du ardura bereganatu eta gobernu berriarekin lanean hasteko.

Karguetarako kinielak hasita badaude ere, Arzalluzek orain arte eman izenen aldean aldaketa garrantzitsuak egongo direla iragarri zuen. «Ezusteak izango da, zuek aipatu dituzten izen guzti horiek ez dutelako zerikusi handirik entzungo dituztenekin», esan zuen.

«Konfiantza judizialak haustura itzela izan du GAL auziarekin»

Itziaki Uriarte / Bilbo

XABIER ARZALLUZ EK hitz gogorrez gaitzetsi zuen Vera eta Barrionuevo aske uzteko Espainiako Auzitegi Gorenak eta hango Gobernuak erabilitako prozedura. Auzitegi gorenak emandako bost arrazoiak banan-banan gezurtatzeaz gain, EAJren azterketa juridikoak legeak ezinbestean eskatzen duen gabezia batez ere ohartarazten du: kartzelaratuen damutzeko jarreraren (ezaren) balorazioa.

Xabier Arzalluzek berretsi zuen «kalean badaude zio politikoengatik» dela. «Han neurtzeko makila bat dago eta hemen beste bat. Batzuetan ematen du tratamendu koloniala ematen digutela, legearen aurrean denak berdin garen zuzenbide estatu batean ezin gerta litezkeelako. Legea era batera erabiltzen da batzuentzat eta beste era batera besteentzat. Batzuentzat lintxamendua dago, eta besteentzat txaloa».

Arzalluzen ustez, Vera eta Barrionuevorentzat indultua eskatu eta askatzeko erabili dituzten oinarri juridikoak aintzat hartuz gero HBko Mahai Nazionalako kideak eta «ETako preso gehienek aske egon beharko lukete».

Espainiako Konstituzioa eskutan, Arzalluzek gogorarazi zuen ezinbestekoa dela epaile eta auzitegien ebazpenak betetzea, hala nola epaiketaren eta ebartzitakoa betetzeko epaileei laguntza ematea. «Har ezazue artikulua hau 118.a-er, aldera ezazu Guadalupearen ikusi dugun guztiarekin eta gero etorri diren neurri judizialekin. Kalean dituzte guztiak, atzean delitu oso larriak egin izanaren susmoa, baina kalean daude eta mundu guztiak uste du ez direla kartzelara bueltatuko».

Marey bahitu izanagatik preso zeudenak indultatu izanak «epaitegiak konfiantza haustura itzela» ekarri duela gaineratu zuen. Arzalluzek ere oroitarazi zuen Madrilgo gobernuak indultua eman ziela txosten juridikoa irakurtzeko ere astirik izan gabe.